

畿輔通志卷八十六

略四十一

河渠十二

隄閘一
洋河隄

灤河隄
永定河隄

桑乾河隄
唐河隄

沙河隄

滋河隄

涿水隄

易水隄

府河隄

大清

河隄

灤河

鐵幡竿渠堰

元史郭守敬傳大德二年召至上都議開鐵幡竿渠守敬奏山水頻年暴下非大爲渠堰廣五七十步不可執政吝於工費以其言爲過緒其廣三之一明年大雨山水下渠不能容按鐵幡竿嶺卽今麻克圖嶺一作嗎尼圖在上都牧廠南界獨石口北三十里其地直灤河之西沽河之東山水下注成渠東導入灤其渠堰今已廢圯

上都御河隄岸

元史河渠志延祐四年六月上都城南御河西北岸爲水衝齧留守司言若不修治恐來春泛溢漂沒民居又開平縣言四月間東關灤河水漲衝損北岸亟宜修築乃委官督夫匠興役

灤河護冰隄

元史河渠志延祐三年五月上都大西關南馬市口灤河侵齧北隄又幹耳朵思佳冬營盤爲灤河走淩沖壞將築護冰隄宜令樞密發軍供役從之按開平城南門外一里卽灤河其兩岸護冰隄遺址尙存

盧龍縣護城隄

元史大德五年八月平灤路言灤河與淝沕三河並溢衝圯城東西二處舊護城隄乃命督水監修之按盧龍縣舊

志有西南二處舊護城隄今盧龍護城隄在西門外向係
官修自西門起至小西門止長一里高一丈五尺乾隆五
年修築

驢糞溝隄埵

灤州志灤河離城十五里地名驢糞溝有民修隄埵二百
九十丈

龍灣頭隄埵

元史河渠志泰定二年三月永平路屯田總管府言訪得
馬城東北五里許張家莊龍灣頭舊有隄以防灤水西南
連清水河至公安橋皆本屯地去歲霖雨水溢衝盪皆盡
宜令都水監及灤州官親詣相視督令有司差夫補築

洋河東岸沙隄

撫甯縣志洋河東岸有沙隄二道乾隆十三年修築長四十八丈高一丈二尺寬二丈按此隄專爲護洋河築

榆固大沙隄

安瀾志大沙隄在熱河二道河榆固一路乃嘉慶四年增築長二百三十丈

雙峰寺壩

安瀾志雙峰寺壩在承德府嘉慶七年修按熱河志府治北八里爲獅子溝九里風雲嶺五里二道河又北五里三道河又東北四里釣魚臺其東里許卽雙峰寺此壩所以當茅溝固都之衝也

黃姑屯壩

安瀾志黃姑屯壩在豐甯縣嘉慶一二年修按黃姑屯在

豐甯縣東北一百二十里此壩所以當伊瑪圖伊遜之衝者也

桑乾河

蔚州護城隄

隄在蔚州城北康熙五十四年知州馬敬玉築乾隆九年知州楊世昌知縣劉士申重築長二百八十丈高一丈寬一丈五尺

辛落塔隄

隄在蔚州城東南乾隆三年知州李仁培請帑修築以瀦南山之水長一百五十丈高八尺寬一丈五尺頂寬一丈朱家莊隄

隄在蔚州城東南境乾隆三年知州李仁培築長一百丈

高八尺底寬一丈五尺頂寬一丈又於壩外挑渠築小石隄一道以爲外禦

氏家莊隄

隄在蔚州城西北沿河南岸一帶乾隆二十三年知州帥家相築以防乾沙河之衝長一百十二丈高五尺有奇寬一丈

壺流河石壩

壩在蔚州北州志云先有小壩旣毀河無所束其流漸涸李主政舜臣築之河復如故

下官莊石壩

壩在蔚州城西北以防乾澗峪乾沙河之水乾隆五年築張家莊石壩

壩在蔚州城南境以防莎澗峪乾沙河之水乾隆三年築
洋河

萬全縣護城隄

隄有二一在城北東沙河西涯土築長一百丈後因洋河
衝齧城根頽圯七十餘丈乾隆三年改建石隄加長至三
百六十丈一在洗馬林堡西沙河東涯亦石築乾隆六年
建亦長三百六十丈

宣化縣洋河南隄

安瀾志隄爲順治十一年建按此與清河北壩皆爲守道
蔡興周等同時所修築者

惠民渠石堰

宣化府志堰有二一在尹官堡康熙四十二年知縣楊汝

輯建一在沙城堡明萬曆四十八年民人宗清宗惠等建
懷來縣護城隄

隄在縣城南門外當水溝口東西之下流乾隆五年知縣
楊大崑請建東西石隄長一百八十丈土築六十六丈
柴溝堡護城隄

懷來縣志隄有二一在堡城西南山舊有峒崙屯泔河一
道引南洋河水下流日久沙淤水由西沙河橫決入城爲
患乾隆五年知縣楊大崑疏濬南河仍由故道復於河西
建石隄一百五十丈一在堡城北門外有廟山溝大沙溝
泔河無雨則涸雨則山水衝注侵及城堡大崑亦令挑挖
並於河旁築土隄二百七十五丈水患以息

新保安北隄

懷來縣志北山水發侵城東路同知余毓浩創築此隄

土木堡河隄

隄在懷來縣西南明初建萬厯間重修

來遠堡城東閘

閘在萬全縣東南所以蓄洩清水河之水而併入洋河者也明萬厯癸丑山西巡撫汪道亨建

張家口護城隄

在萬全縣東三十里乾隆間民築十二年總督高斌加高三尺二十三年重修按宣化府志張家口上堡被水衝塌二孔縣令徐守基詳請興修閤部高斌奏將水洞悉行拆卸打鑿山嘴以順水流於乾涸時安設木柵妨奸匪出入并修大石壩一道長十七丈五尺南接修竹絡圍壩一道

長一百六十丈口外民修石壩一道長一百三十丈

洗馬林堡西壩

堡在萬全縣西南七十里壩在堡城之西所以禦孫才溝水之衝者也溝在洗馬林西南十里許下合洋河

清河北壩

宣化縣志河先有石壩數十丈迎城迤北斗口施槽外以溉田內引入城灌畦順治十一年推官方畿同知陳經濟守道蔡興周修康熙六年隄潰守道方端士修次年復決四十四年知縣陳坦白乃南讓河岸丈餘另修簾簍隄十丈石隄十丈迤西土隄一百十丈水始安流四十六年復加修葺

柳河川大壩

柳河川由北山寺繞宣化府城自北折西轉南入洋河大壩十五里險處用石次用磚乾隆十八十九兩年城北石壩衝圯金河奪溜貫城而下總督方觀承奏修略云宣郡西北大壩長十五里三分上游建瓴羣山扼束勢猛且急而河岸北高南下浮沙無根且北崖山嘴直射河狹溜迅底穿輒陷宜鑿去山嘴高一丈五尺長二十二丈寬三丈以拓河面又開引河一道長二百丈以分其流凡坐彎處裁圓取直其舊壩根頂敲斜石縫綻裂皆砌雁翅順水小壩用堅石鉤排以拒爲護其土壩則木椿固之編圍護之上悉栽柳五六年後材木不可勝用矣

趙川堡前後壩

趙川堡在龍門縣西南五十里泥河之北前壩距堡十五

里後壩距堡十七里

和合口壩

壩在懷來縣西南六十里一名合河口乃桑乾洋河清夷三水合流處也今多傾圯按宣化府志乾隆九年總河高斌以河勢迅疾議於懷來縣南桑乾洋河媯川三河匯流之和合口動帑修築石壩二道各長十四丈寬十七丈以殺下流曰玲瓏壩至十二年被水衝刷旋修旋塌至十六年總督方觀承飭委本管道府查勘又檄知縣吳文正細查河內有無沙磧石底吳造五尺鐵椎乘筏探視乃盡沙無石兩岸峭石壁立遂於中搯橫木鋪板以渡如棧道狀號爲大板橋又里許爲小板橋過此則沿河之徑絕矣自是始停歲修壩工遂廢

永定河

兩金溝石隄

金溝卽古金口河分南北二溝爲渾河出山第一緊要處俱石隄歲事修補其北金溝片石隄長十丈寬二丈高四尺南金溝片石隄長三十丈寬二丈二尺高一丈四尺蓋猶金元舊制也

石景山隄工

此隄舊於兩岸通編爲天字三十九號乾隆二十八年始分東西兩岸東岸長二十三里五分編二十四號西岸長十四里編十四號至四十九年河道陳琮以隄工號數定限一百八十丈爲一里稟請咨部更正除南北金溝石工二段舊例爲一號外東岸自南金溝起至北岸上頭工交

界止長二十三里九十六丈編爲二十四號西岸蘆溝橋
以北地勢高阜舊本無隄自橋翅南起至南岸頭工交界
止長十四里編爲十四號接石景山隄工土石並用其內
皆幫片石戩隄以期保固先是河自麻峪村分爲二支而
東強西弱恐溢郊圻乾隆二年大學士鄂爾泰乃於麻峪
橋口築攔河隄將東支堵截使盡歸西流再接築石子壩
卽有漫水不能奪溜而河乃化險爲平矣

南北兩岸舊隄

康熙三十一年直隸巡撫郭世隆修築渾河隄岸查得固
安永清之北有故隄七十二里歲久傾頽請照舊繕完以
資防禦又以南岸旣固北水無歸并請濬永清縣東北舊
河五十四里使順流歸淀是年四月興工五月工畢

謹按此次修濬實爲經理渾河下流章程之始固安縣河濱龍神廟尙有碑文載其事可考

南北大隄

康熙三十七年挑河自良鄉縣老君堂舊河口起經固安縣北至永清縣郭家務止長八十二里有奇北岸築大隄自良鄉縣張廟場起至永清縣盧家莊止長一百二里有奇並於舊河口建竹絡壩復自南岸高店村土坡下起至壩止推接沙隄三十五里連大隄通長一百十七里四分北岸復自蘆溝橋南石隄下起至利堡村南止堆築沙隄二十二里利堡至張廟場大隄五里地皆高阜連前大隄通長一百二十九里二分至三十九年安瀾城河口淤墊於南岸另挑一河以南岸爲北岸遂自郭家務改河出霸

州柳岔口入辛章淀達天津歸海接築兩岸大隄尾南岸接郭家務大隄尾起至霸州柳岔口止連上共長一百七十九里北岸自盧家莊西何麻子營接大隄起至柳岔口迤東止連上共長一百八十里

雍正三年辛章勝勞一帶淀河復淤有礙清水達津之路議引渾河別由一道遂於柳岔口稍北改河由郭家務挑河計長七十四里經永清縣冰窖村東入三角淀接築兩岸大隄南岸自冰窖起至武清縣王慶坨止長四十四里連上共長一百九十六里九十五丈五尺北岸自何麻子營起至武清縣范甕口止長七十四里有奇連上共長二百三里六十二丈兩岸分八工其冰窖至柳岔口隄工遂廢卽今之東西老隄也至八年因南七北七兩工險要乃

各分上下汛至十年北岸以天地黃宇宙洪日月盈九字
分工編號南岸以辰辰宿列張寒來暑往九字分工編號
其工段分隸南北岸同知管轄

乾隆三年又接西老隄起築坦坡埝至武清縣龍尾村止
長四十九里九分四年又自北岸六工十六號起築北隄
至東安縣賀家新莊止長三十六里五年又接北隄尾起
築北堰至武清縣東蕭家莊止長四十七里一百二十六
丈十六年復由冰窖草壩改河以坦坡堰爲南堰改北隄
爲北堰各分上中下三汛卽今所謂舊南北隄也計自石
景山同知所管交界起南岸至南堰上汛交界止隄長一
百五十四里北岸至北堰上汛交界止隄長一百五十五
里七十二丈至二十年冰窖河口以北淤成南高北低乃